

四庫全書

集部

欽定四庫全書

唐宋八大家文鈔卷一百五十六

明茅坤撰

潁濱文鈔十二

論

新論上

此三篇原是一意其所言為國之地即予瞻所謂為國先定其規模之說而中篇指言吏媮兵

冗財絀三者亦皆子瞻所建議處特其行文於
舉子業中為利輟姑錄而存之

古之君子因天下之治以安其成功因天下之亂以濟
其所不足不誣治以為亂不援亂以為治援亂以為治
是愚其君也誣治以為亂是脅其君也愚君脅君是君
子之所不忍而世俗之所僥倖也故莫若言天下之勢
試請言當今之勢當今天下之事治而不至於安亂而
不至於危紀綱粗立而不舉無急變而有緩病此天下

之所共知而不可欺者也然而世之言事者為大則曰
無亂為異則曰有變以為無亂則可以無所復為以為
有變則其勢常至於更制是二者皆非今世之忠言至
計也今世之弊患在欲治天下而不立為治之地夫有
意於為治而無其地譬猶欲耕而無其田欲賈而無其
財雖有鉏耰車馬精心彊力而無所施之故古之聖人
將治天下常先為其所無有而補其所不足使天下凡
可以無患而後徜徉翺翔惟其所欲為而無所不可此

所謂為治之地也為治之地既立然後從其所有而施之植之以禾而生禾播之以菽而生菽藝之以松栢梧櫟叢莽樸椒無不盛茂而如意是故施之以仁義動之以禮樂安而受之而為王齊之以刑法作之以信義安而受之而為霸督之以勤儉厲之以勇力安而受之而為彊國其下有其地而無以施之而猶得以安存最下者抱其所有悵悵然無地而施之撫左而右動鎮前而後起不得以安全而救患之不給故夫王霸之畧富強

之利是為治之具而非為治之地也有其地而無其具
其弊不過於無功有其具而無其地吾不知其所以用
之昔之君子惟其才之不同故其成功不齊然其能有
立於世未始不先為其地也古者伏羲神農黃帝既有
天下則建其父子立其君臣正其夫婦聯其兄弟殖之
五種服牛乘馬作為宮室衣服器械以利天下天下之
人生有以養死有以葬歡樂有以相愛哀感有以相弔
而後伏羲神農黃帝之道得行於其間凡今世之所謂

長幼之節生養之道者是上古為治之地也至於堯舜
三代之君皆因其所闕而時補之故堯命羲和歷日月
以授民時舜命禹平水土以定民居命益驅鳥獸以安
民生命棄播百穀以濟民饑三代之間治其井田溝洫
步畝之法比閭族黨州鄉之制夫家卒乘車馬之數冠
婚喪祭之節歲時交會之禮養生除害之術所以利安
其人者凡皆已定而後施其聖人之德是故施之而無
所齟齬舉今周官三百六十人之所治者皆其所以為

治之地而聖人之德不與也故周之衰也其詩曰雖無
老成人尚有典刑由此言之幽厲之際天下亂矣而文
武之法猶在也文武之法猶在而天下不免於亂則幽
厲之所以施之者不仁也施之者不仁而遺法尚在故
天下雖亂而不至於遂亡及其甚也法度大壞欲為治
者無容足之地泛泛乎如乘舟無楫而浮乎江湖幸而
無振風之憂則悠然惟水之所漂東西南北非吾心也
不幸而遇風則覆沒而不能止故三季之極乘之以暴

君加以虐政則天下塗地而莫之救然世之賢人起於亂亡之中將以治其國家亦必於此焉先之齊桓用管仲辨四民之業連五家之兵卒伍整於里軍旅整於郊相地而征山林川澤各致其時陵阜陸瑾各均其宜邑鄉縣屬各立其正舉齊國之地如畫一之可數於是北伐山戎南伐楚九合諸侯存邢衛定魯之社稷西尊周室施義於天下天下稱伯晉文反國屬其百官賦職任功輕關易道通商寬農懋穡勸分省財足用利器明

德舉善援能政平民阜財用不匱然後入定襄王救宋
衛大敗荆人於城濮追齊桓之烈天下稱之曰二伯其
後子產用之於鄭大夫種用之於越商鞅用之於秦諸
葛孔明用之於蜀王猛用之於苻堅而其國皆以富强
是數人者雖其所施之不同而其所以為地者一也夫
惟其所以為地者一故其國皆以安存惟其所施之不
同故王霸之不齊長短之不一是二者不可不察也當
今之世無惑乎天下之不躋於大治而亦不陷於大亂

也祖宗之法具存而不舉百姓之患畧備而未極賢人君子不知尤其地之不立而罪其所施之不當種之不生而不知其無容種之地也是亦大惑而已矣且夫其不躋於大治與不陷於大亂是在治亂之間也徘徊徬徨於治亂之間而不能自立雖授之以賢才無所為用不幸而加之以不肖天下遂敗而不可治故曰莫若先立其地其地立而天下定矣

新論中

治國而為其地非聖人而後然也古之君子莫不皆然
而其不然者則僅存之國也人之治其家也其最上者
為虞舜其次為曾閔而其次猶得為天下之良人其下
者乃有不慈不孝置其不慈不孝蓋自其得為良人以
上至於為舜其所以治其身上以事其父母下以化服
其妻子者不同而其所以為生者子耕於田婦織於室
養其雞豚殖其菜茹無失其時以養生送死雖舜與天
下之良人均也舜而不然不得以為舜天下之人不然

不得以為良人何者是亦治家之地焉耳而至於為國而豈獨無之昔者文王之治岐也耕者九一故周公因之建為步畝溝洫之制何者其所因者治世之成法也孔子之治魯也魯人獵較孔子亦獵較何者其所因者哀世之餘制也當戰國之彊諸侯無道然孟子亦以為有王者起今之諸侯不可盡誅惟教之不改而後誅之故漢之興也因秦之故而不害其為漢唐之興也因隋之故而不害其為唐由此觀之則夫享國之長短致化

之薄厚其地能容之而不能使之也地不能使之長短
薄厚然長不得地則無所效其長厚不得地則無所致
其厚故夫有地而可以容有所為者舉而就之可也當
今之世祖宗之法或具存而不舉或簡畧而不備具存
而不舉是有地而不耕也簡畧而不備是地有所廢缺
而不完也欲築室者先治其基基完以平而後加石木
焉故其為室也堅今之治天下則不然蓋嘗論之自五
代以來彊臣專國則天下震動而易亂自吾祖宗削而

漸磨之則今世可以粗安凡今世之所恃以為安者惟無彊臣而已然恃其一之粗安也而盡忘其餘故嘗以為當今有三不立由三不立故百患並起而百善並廢何者天下之吏媮惰苟且不治其事事日已敗而上不知是一不立也天下之兵驕脆無用召募日廣而臨事不獲其力是二不立也天下之財出之有限而用之無極為國百年而不能以富是三不立也基未平也加之以其所欲為是故興一事而百弊作動一役而天下困

投足而遇陷穽側身而入河海平居猶懼有患而況求以馳騁於其上哉固不可矣今夫邊陲之患是中國之一病也吾欲拒之則有以為拒之之具和之則有以為和之之費以天下而待一國其為有餘力也固亦宜矣而何至使天下皆被其患今也天下幸而無他患難而唯西北之為畏然天下之力亦已困而不能支矣一歲之入不能供一歲之出是非特納賂之罪也三事不立之過也故三事立為治之地既成賂之則為漢文帝不

賂則為唐太宗賂與不賂非吾為國治亂之所在也治
亂之所在在乎其地之立與不立而已矣天下之事因
循而維持之以至於漸不可舉猶曰是養之未至也乘
舟中流釋其楫而聽水之所之旋於洄洑格於洲浦以
為是固然也其為無具亦已甚矣以今之時天子仁恕
士大夫好善天下之風俗不至於朋黨亂正誣罔君子
也世之清議凜然在矣公卿之欲有為以濟斯世誰有
言者而曰吾有所待是徒空言非事實也故為之說曰

居之以彊力發之以果敢而成之以無私夫惟有私者不可以果敢果於一不果於二天下將以為言不果者不可以彊力力雖彊而輒為多疑之所敗天下之人惟能為是三者則足以排天下之堅彊而納之於柔懦擾天下之怨怒而投之於不敢惟不能為是三者則足以敗天下之賢才而卒之以不能有所建是故無私而果敢果敢而彊力以是三者治天下之三不立以立為治之地為治之地既立然後擇其所以施之天下將無所

不可治

新論下

天下之未治也患三事之不立苟其既立則患其無以施之蓋君子為國正其綱紀治其法度皆可得而知也惟其所以施之則不可得而知周公之治周也修其井田封建百辟可得而知也其所以使天下歸周者不可得而知也孔子之治魯也墮其三都誅其亂政可得而知也其所以使羔豚不飾賈男女別於道者不可得而

知也孟子之所以治邦者正其疆界五口之家桑麻雞豚必具可得而知也其所以使之至於王者不可得而知也孔子孟子之所汲汲以教人者在其不可得而知而其可得而知者不詳論也曰是有意於治者能之然而亦不可去也故其得為是國也必舉之以為先由是觀之治國之地聖人無之不得以施其聖然而聖人之道有所高遠而不可及者矣其於孔子之門所謂政事而冉有子路之所能者治國之地也子路曰千乘之國

攝乎大國之間加之以師旅因之以饑饉由也為之可使有勇且知方也冉有曰方六七十如五六十求也為之可使足民如其禮樂以俟君子是亦自以為能為其地而未有以施之云爾然夫子許其能之而不以為大賢則夫子之道深矣遠矣夫子平居朝夕孜孜以教人者惟所以自修其身而其所以修其政事者未嘗言也蓋亦嘗言之矣曰謹權量審法度修廢官興滅國繼絕世舉逸民所重民食喪祭是九者凡所以為政而未足

也故繼之曰寬則得衆信則人任焉敏則有功公則說是四者所以成之焉耳其意以為既成而後以其平居自修之身施之故記曰君子篤恭而天下平為有此具也君子修其身無所施之則不立治其政事無以施之則不化當三代之治也天下之事無不畢舉雖後世之君猶得守其法度以為無過惟無暴君則天下可安故伊尹之訓太甲曰從諫弗咈先民時若以為如是而可以為治已矣古之人言治天下若甚易然今之人以為

大言而不信不知其有此地也悲夫世之君子孜孜以修其身恭儉忠信欲以施之天下終身而不見其成則以為古之人欺我也夫苟以為古之人欺我雖有為之者蓋勉強而為之也夫苟不欲而強為之則其心益不自信而道日踈夫以不信之心行日踈之道以治無以為地之國是以功不可成而患日至故莫若退而立其為治之地為治之地既立則身修而天下可化也

燕趙論

行文佳所議未當

昔者三代之法使天下立學校而教民行鄉射飲酒之禮於歲之終田事既畢而會其鄉黨之耆老設其籩豆酒食之薦而天子之大夫親為之行禮蓋以為田野之民裸裎其股肱而勞苦其筋力長幼雜作以趨一時之利習於鄙野之俗而不知孝悌之節頑嚚無耻不可告語而易與為亂是以因其休息而教之以禮使之有所不忘於其心故三代之民雖耕田荷任之賤其所為者

甚鄙而其中必有所守其心甚朴而亦不至於無知以
犯非義何者其上之人不以為鄙而不足教而其民亦
喜於為善也至於後世之衰天下之民愚者不知君臣
父子之義而天下之風俗日已敗亂今夫輕揚而剽悍
好利而多變者吳楚之俗也勁勇而沉靜推鈍而少文
者燕趙之俗也以輕揚剽悍之人而有好利多變之心
無三代王者之化宜其起而為亂矣若夫北方燕趙之
國其勁勇沉靜者可以議動而推魯少文者可以信結

也然而燕趙之間其民常至於自負其勇以為盜賊無以異於吳楚者何也其勁勇近於好亂而其椎魯近於無知上失其道而燕趙之良民不復見於當世而其暴戾之夫每每亂天子之治仲尼曰君子有勇而無義為亂小人有勇而無義為盜故古之聖人止亂以義止盜以義使天下之人皆知父子君臣之義而誰與為亂哉昔者唐室之衰燕趙之人八十年之間百戰以奉賊臣竭力致死不顧敗亡以抗天下之兵而以為忠臣義士

之所當然當此之時燕趙之士唯無義也故舉其忠誠
專一之心而用之天下之至逆以拒天下之至順而不
知其非也孟子曰無常產而有常心者唯士為能若民
則無常產因無常心放僻邪侈無不為已故夫燕趙之
地常苦夫士大夫之寡也

子由此論殆亦未嘗深知燕趙之俗耳予嘗宦
遊燕趙燕趙之士多忠信感慨自古其地多節
俠死義者亦以此特存夫上之以詩書禮樂相

為摩切者何如耳子由罪燕趙當唐中葉時擁
叛將者八十餘年抑不知罪在將非在吏民也
河澗魏博之間多明經獨行而即如田野閭里
間雖有鬪雞走馬蹋鞠弓矢之習而有賢守令
以為之長且勝齊魯矣而况吳楚乎

蜀論

蘇氏父子蜀人也故論蜀多詳

匹夫匹婦天下之所易也武夫任俠天下之所畏也天

下之人知夫至剛之不可屈而不知夫至柔之不可犯
也是以天下之亂常至於漸深而莫之能止蓋其所畏
者愈驕而不可制而其所易者不得志而思以為亂也
秦晉之勇蜀漢之怯怯者重犯禁而勇者輕為姦天下
之所知也當戰國之時秦晉之兵彎弓而帶劍馳騁上
下咄嗟叱咤蜀漢之士所不能當也然而天下既安秦
晉之間豪民殺人以報仇讐椎埋發冢以快其意而終
不敢為大變也蜀人畏吏奉法俯首聽命而其匹夫小

人意有所不適輒起而為亂其故何也觀其平居無事
盜入其室懼傷而不敢校此非有好亂難制之氣也然
其弊常至於大亂而不可救則亦優柔不決之俗有以
啟之耳今夫秦晉之民倜儻而無所顧負力而傲其吏
吏有不善而不能以有容也叫號紛呶奔走告訴以爭
毫釐曲直之際而其甚者至有懷刃以賊其長吏以極
其忿怒之節如是而已矣故夫秦晉之俗有一朝不測
之怒而無終身戚戚不報之怨也若夫蜀人辱之而不

能競犯之而不能報循循而無言忍詬而不驟發也至於其心有所不可復忍然後聚而為羣盜散而為大亂以發其憤憾不洩之氣故雖秦晉之勇而其為亂也志近而禍淺蜀人之怯而其為變也怨深而禍大此其勇怯之勢必至於此而無足怪也是以天下之民惟無怨於其心怨而得償以快其怒則其為毒也猶可以少解惟其鬱鬱而無所洩則其為志也遠而其毒深故必有大亂以發其怒而後息古者君子之治天下强者有所

不憚而弱者有所不侮蓋為是也書曰無虐惇獨而畏
高明詩曰不侮鰥寡不畏強禦此言天下之匹夫匹婦
其力不足以與敵而其智不足以與辯勝之不足以為
武而徒使之怨以為亂故也嗟夫安得斯人者而與之
論天下哉

西戎論

宋之西戎夏也今則不同

西北之俗畏服大種而輕中國此強則臣彼彼強則臣

此彼此皆弱而後中國可得而臣彼此皆強而後侵略之患不至於中國蓋一強而一弱中國之患也彼其弱者不敢獨戰是以爭附強國之餘威以趨利於中國而後無所懼強者并將弱國之兵蕩然南下而無復反顧之憂然後乃敢專力於中國而不去此二者以勢相從而不可間是以中國之士常不得解甲而息也昔者冒頓老上之盛惟西戎之無強國也故匈奴之人得以盡力而苦吾中國使西戎有武力戰勝之君則中國之禍

將有所分而不專何者彼畏西戎之乘其後也故匈奴
強則中國不得不厚西戎之君而西戎之君亦將自託
於中國然而西戎非有強力自負之國則其勢亦將折
而入於匈奴惟其國大而好勇其君之意欲區區自立
於一隅而不畏匈奴之衆而後中國可得而用也然天
下之人皆以為北方有強悍不屈之匈奴而又重之以
西戎之大國則中國不勝其困此何其不思之甚也夫
西北之人惟其愚陋而多怨是故可與共憂也惟其強

狠而好勝是故可以激而壯也使之自相攻擊而不能
相下則其勢必走於中國中國因而收之而其不服者
乃可圖也然天下之議又將以為西北之俗不喜自相
攻鬪而喜擊中國之衆此其勢固不可得而合也愚亦
以為不然夫四夷之所以喜攻中國者為夫吾兵之不
能苦戰而錦繡金玉之所交會也今使吾兵精而食足
據險阻明烽燧吏士練習而不敢懈彼雖有壯騎無所
施設則其利不在於攻中國堅坐而相守不出十年彼

外無所掠虜將不忍而熱中將反而求以相詬以為起
兵之名彼兵交於匈奴而怨結於中國則何以自固故
中國舉而收之必將得其懽心然天下之心常畏其強
而莫或收之而使為北狄之用此何其不識戎狄之情
也

北邊論

鼓中國之氣

北邊之民其性驕蹇強悍便於射獵而習於馳騁生於

斤鹵之地長於霜雪之野飲水食肉風雨饑渴之所不能困上下山坂筋力百倍輕死而樂戰故常以勇勝中國至於其所以擁護親戚休養生息畜牛馬長子孫安居佚樂而欲保其首領者蓋無以異於人人也而中國之士常憚其勇畏避而不敢犯北方之民亦以此恐喝中國而奪之利此當今之所謂大患也昔者漢武之世匈奴絕和親攻當路塞天下震恐其後二十年之間漢兵深入不憚死亡捐命絕幕之北以決勝負而匈奴孕

重墮壞人畜疲弊不敢言戰何者勇士壯馬非中國之
所無有而窮追遠逐雖匈奴之衆亦終有所不安也故
夫敵國之盛非鄰國之所深憂也要在休兵養士而集
其勇氣使之不懾而已方今天下之勢中國之民優游
緩帶不識兵革之勞驕奢怠惰勇氣消耗而歲幣之賂
又以百萬為計轉輸天下甘言厚禮以滿其不足之意
使天下之士耳熟所聞目習所見以為生民之命寄於
其手故俯首柔服莫敢抗拒凡中國勇健豪壯之氣索

然無復存者矣夫戰勝之民勇氣百倍敗兵之卒沒世不復蓋所以戰者氣也所以不戰者氣之畜也戰而後守者氣之餘也古之不戰者養其氣而不傷今之士不戰而氣已盡矣此天下之所大憂也昔者六國之際秦人出兵於山東小戰則殺將大戰則割地兵之所至天下震慄然諸侯猶帥其罷散之兵合從以擊秦砥礪戰士激發其氣長平之敗趙卒死者四十萬人廉頗收合餘燼北推栗腹西抗秦兵振刷磨淬不自屈服故其民

觀其上之所為日進而不挫皆自奮怒以爭死敵其後
秦人圍邯鄲梁王使將軍新垣衍如趙欲遂帝秦而魯
仲連慷慨發憤深以為不可蓋天下之士所為奮不顧
身以抗強虎狼之秦者為非其君也而使諸侯從而帝
之天下尚誰能出身以事非其君哉故魯仲連非徒惜
夫帝秦之虛名而惜夫天下之勢有所不可也今尊奉
累世仇讎之人交歡納幣以為兄弟之國奉之如驕子
不敢一觸其意此適足以壞天下義士之氣而長敵人

豪橫之勢耳愚以為養兵而自重卓然特立不聽夷狄之妄求以為民望而全吾中國之氣如此數十年之間天下摧折之志復壯而北方之勇非吾之所當畏也

西南夷論

此篇議亦未的確但論班超一著甚是

古者九夷八蠻無大君長紛紛籍籍不相統制惟匈奴之種常為大國以抗中夏然蠻夷之俗種姓分別千人為部百家為黨見利則聚輕合易散族類不一其心終

莫相愛故其兵利於疾戰而不利於持久匈奴之人綿地千里控弦百萬侯王君長通為一家人畜富盛蔓延山谷之間其心常有所愛重而不忍去故其兵利於持久而不利於疾戰此二者其大小之勢各有所便宜乎中國之所以待之者各有道也今夫匈奴之人伏於陰山之下養兵休士久居而不戰此其志豈嘗須臾忘中國也然其心以為戰而勝人猶不若不戰而屈人之兵戰而不勝民之死者未可知也故常大言虛喝而不進

以謀弊中國蓋其所愛者愈大故其謀之愈深而發之愈緩以求其不失也若夫西戎南蠻西南夷之民悉其衆庶尚不能當匈奴之半而其酋長每每為亂不能自禁此誠無愛於其心而僥倖於一戰以用其烏合之衆而已故夫蠻夷之人擾邊求利其中非有大志者其類皆可以謀來也愚嘗觀於西南徼外以臨蠻夷之衆求其所以為變之始而遂至於攻城郭殺人民縱橫放肆而不可救者其積之莫不有漸也夫蠻夷之民寧絕而

不與通今邊鄙之士利其貨財而納之於市使邊民凌侮欺謾而奪其利長吏又以為擾民而不之禁窮患無聊莫可告訴故其勢必至於解仇結盟攻剽蹂踐殘之於鋒鏑之間而後其志得伸也嗟夫為吏如此亦見其不知本矣通關市戢吏民待之如中國之民彼尚誰所激怒而為此哉然事不患乎不知而患乎人之不能用昔班超處西域數十年西破龜茲北伏匈奴及將東歸或以為必有奇謀乃就問其計然其言止曰察見淵中

魚不祥屯戍之士皆非忠臣孝子不可盡繩以法當是時莫不皆笑以為不足用然及西域之亂終亦以此故夫謀非必奇而後可用而在乎當否而已古者四夷皆置校尉而益州有蠻夷騎都尉以治其事使其疆者不能內侵而弱者不為中國之所侮蓋為是也

子由之論西戎北邊大略並按宋情事本末而為之者北邊以騎射為業逐水草食肉酪而西羌則各塹山谷分部落而南夷則戀巢穴世俗

土故其勇悍聚散不同而所以制御之者亦不同
西戎南蠻撫勦兼施可以懷柔而北邊則惟
戰守二策耳

史官助賞罰

舉業文字之佳者

域中有三權曰天曰君曰史官聖人以此三權者制天下之是非而使之更相助夫惟天之權而後能壽夭禍福天下之人而使賢者無夭橫窮困之災不賢者無以

享其富貴壽考之福然而季路原憲古所謂賢人者也
伏於窮閭之下布衣饘粥之不給盜跖莊蹻橫行於天
下食人之肝以為糧而老死於牖下不見兵革之禍如
此則是天之權有時而有所不及也故人君用其賞罰
之權於天道所不及之間以助天為治然而賞罰者又
豈能盡天下之是非而賞罰之於一時猶懼其不能明
著暴見於萬世之下故君舉而屬之於其臣而名之曰
史官蓋史官之權與天與君之權均大抵三者更相助

以無遺天下之是非故荀悅曰每於歲盡舉之尚書以助賞罰夫史官之興其來尚矣其最著者在周曰佚在魯曰克在齊曰南氏在晉曰董狐在楚曰倚相觀其為人以度其當時之所書必有以助賞罰者然而不獲見其筆墨之所存以不能盡其助治之意獨仲尼因魯之史官左丘明而得其載籍以作為春秋是非二百四十二年雖其名為經而其實史之尤大彰明者也故齊桓晉文有功於王室王賞之以侯伯之爵征伐四國之權

而春秋又從而屢進之此所以助乎賞之當於其功也
吳楚徐越之僭皆得罪於其君者也而春秋又從而加
之以斥絕擯棄不齒之辭此所以助乎罰之當於其罪
也若夫當時賞罰之所不能及則又為之明言其狀而
使後世嗟嘆痛惜之不已嗚呼賢人君子之功烈與夫
亂臣賊子罪惡之狀於此皆可以無憂其無聞焉是故
古者聖人重史官當漢之時號曰太史令而其權在丞
相之上郡國計吏上計於太史而後以其副上於丞相

御史夫惟知其權之可以助賞罰也故從而尊顯之然則後之史官其可以忽哉

劉愷丁鴻孰賢

此子由同兄應試之文雖不及子瞻而議論正大自足成一家言仁宗謂為子孫得兩賢宰相誠哉知人


天下之讓三有不若之讓有相援之讓有無故之讓讓之為名天下之大功大善也然而至於無故之讓則聖

人深疾而排之以為此姦人之所以盜名於暗世者也
昔者公族穆子之讓韓起范宣子之讓智伯宣子穆子
中心誠有愧於彼二人者是不若之讓也舜之命禹也
讓於皋陶其命益也讓於朱虎熊羆夫皋陶之不能當
禹之任朱虎熊羆之不能辨益之事亦明矣然猶讓焉
者是所謂相援之讓也夫使天下之人皆讓其所不及
則賢材在位而不肖者不爭皆能以相推則賢者以類
升而小人不能間此二者天下之大善也至於無故之

讓則天下之大不善也東漢之衰丁鴻鄧彪劉愷此三人者當襲父爵而以讓其弟非有先君之命非有嫡庶之別而徒讓焉以自高於世俗世之君子從而譏之然此三人者之中猶有優劣焉劉鄧讓而不反以遂其非丁鴻讓而不終聽其友人鮑駿之言而卒就國此鴻之所以為賢於劉鄧也且夫聞天下之讓而欲竊取其名以自高其身以邀望天下之大利者劉愷之心也聞天下之讓而竊慕之而不知其不同以陷於不義者丁鴻

之心也推其二心而定其罪則鴻在可恕而愷為可戮
此真偽之辨也賢愚可以見矣故范曄曰太伯伯夷未
始有其讓也故太伯稱至德伯夷稱賢人末世徇其名
而昧其致則詭激之行興矣若夫鄧彪劉愷讓其弟以
取義使弟受非服而已受其名不已過乎夫君予之立
言非以苟顯其理將以啟天下之未悟者立行非以苟
顯其身將以教天下之方動者言行之所開塞可無慎
乎丁鴻之心存乎忠愛故能終悟而從義異乎二子之

徇名者也嗚呼世之邪僻之人苟冒天下之美名以僥
倖天下之大利自以為人莫吾察也而不知君子之論
有以見之故為天下不可以不貴君子之論也



唐宋八大家文鈔卷一百五十六

欽定四庫全書

集部

唐宋八大家文鈔卷一百

五十七至
六十

詳校官左中允_臣瑋五珠

侍讀_臣孫球覆勘

總校官檢討_臣何思鈞

校對官助教_臣胡予襄

謄錄舉人_臣吳之承

謄錄貢生_臣苗序洙

欽定四庫全書

唐宋八大家文鈔卷一百五十七

明茅坤撰

潁濱文鈔十三

策

君術策一

君術五篇亦是一篇大畧欲人君知所以御天下之術而行文甚紆徐百折當熟看波瀾處

天下之事非宰相不可盡行非諫官不可盡言天下之人誰能必至於諫官宰臣者惟其少而學之長而欲行之終其身而不當其位不可以侵官而求盡其意是故士大夫之間猶有不能自盡其才於天子者也今臣幸而生於天下無事之時每一間歲天子常詔兩制大臣使舉天下之士上自登朝之吏而下至於山林之匹夫咸得竭其所懷以盡天下之利害非天子出納耳目之官而得以言萬民之情偽非天子黜陟賞罰之臣而得

以論百官之長短非天子武力將帥之士而得以議兵
革之強弱非天子錢穀太農之吏而得以權財用之多
少蓋天下之人非必為宰相諫官而後可盡行而盡言
者使之一旦得以詳數而悉說之此有以見天子之意
所以待之者甚重而不輕也而臣何敢以無說而處於
此臣常以為天下之事雖其甚大而難辦者天下必有
能辦之人蓋當今之所謂大患者不過曰四夷強盛而
兵革不振百姓凋弊而官吏不飭重賦厚歛而用度不

足嚴法峻令而姦宄不止此四患者所以使天子坐不安席中夜太息而不寐者也然臣皆以為不足憂何者天下必有能為天子出力而為之者而臣之所憂在乎天下之所不能如之何者也臣聞善治天下者必明於天下之情而後得御天下之術術者所謂道也得其道而以智加焉是故謂之術古之聖人惟其知天下之情而以術制之也故萬物皆可得而役其生皆可得而制其死牛服於箱馬服於轅鷹隼服於韝牛不可以有所

觸馬不可以有所踉蹌隼不可以有所擊此三者喜怒
好惡之情發於其外而見於人也是以因其所忌而授
之以其術至於終身制於人而不去且治天下何異於
治馬也馬之性剛狠而難制急之則弊而不勝緩之則
惰而不進王良造父為之先後而制其遲速驅之有方
而掣之有時則終日蹢躅而不知止此術之至也古之
聖人驅天下之人而盡用之仁者使效其仁勇者使效
其勇智者使效其智力者使效其力天下之人雖雜然

皆列於前安得仁人君子而後任之且雖有天下之善
人與之處而不知其情御之而不中其病則雖有好善
之心而不獲好善之利何者彼不徒為吾用也而況乎
天下之英雄欲收其功而不制其心哉昔者秦漢之際
姦宄猛悍之人所在而為寇高祖發於豐沛之間行而
收之黥布彭越之倫皆撫而納諸其中其所以制之者
甚備也玉帛子女牛羊犬馬以極其豪侈之心輕財好
施敦厚長者以服其趨趨之懷倨肆傲岸輕侮凌辱以

折其強狠之氣其視天下之英雄不啻若匹夫孺子然
皆得其歡心而用其死力至於元成之世天下久於太
平士大夫生於其間無復英雄難制之風天下之士皆
書生好儒其才氣勇力無足畏者俛首下氣求為之用
而不暇元成哀平亦欲得天下之賢才而用之然而不
知其情不獲其術賢人君子避讒畏譏遠引而去而小
人宦豎縱橫放肆而制其事此甚可憫也夫人之平居
朋友之間僕妾之際莫不有術以制其變蓋非有深遠

難見之事也欲其用命而見其所害欲其樂從而見其所利欲其喜而致其所悅欲其懼而致其所忌欲其開心見誠而示之以無所恐欲其守死不去而示之以無所往此天下之人皆能知之而至於治天下則不能用且此過矣天下以為天子之尊無所事術也而不知天下之事惟其英雄而後能有大功而世之英雄常苦豪橫太過而難制由是觀之治天下愈不可以無術也

子由借高帝駕御英雄一節作議論行文雖善

而不切當世情事

君術策二

分兩扇總叙 子由欲感悟主上察臣下之情
以收其御臣下之術然通篇論古處透而影今
處不切此其所以不及歐陽子也

將求御天下之術必先明於天下之情不先明於天下
之情則與無術何異夫天下之術臣固已畧言之矣而
又將竊言其情今使天子皆得賢人而任之雖可以無

憂乎其為姦然猶有情焉而不可以不知蓋臣聞之人
有好為名高者臨財推之以讓其親見位去之以讓其
下進而天子禮焉則以為歡進而不禮焉則雖逼之而
不食其祿方為廉恥之節以高天下若是而天子不知
焉而泰之以厚利則其心赧然有所不平人有好為厚
利者見祿而就之以優其身見利而取之以豐其家良
田大屋惟其與之則可以致其才如是而天子不知焉
而強之以名高則其心缺然有所不悅於其中人惟無

好自勝也好自勝而不少柔之則忿鬪而不和人惟無
所相惡也有所相惡而不為少避之則事其私怒而不
求成功素剛則無折之也素畏則無強之也強之則將
不勝而折之則將不振凡此數者皆所以求用其才而
不傷其心也然猶非所以馭天下之姦雄蓋臣聞之天
下之姦雄其為心也甚深而其為迹也甚微將營其東
而形之於西將取其右而擊之於左古之人有欲得其
君之權者不求之其君也優游翱翔而聽其君之所欲

為使之得其所欲而油然自故以釋天下之權天下之權既去其君而無所歸然後徐起而收之故能取其權而其君不之知古之人有為之者李林甫是也夫人既獲此權也則思專而有之專而有之則常恐天下之人從而傾之夫人惟能自固其身而後可以謀人自固之不暇而欲謀人也實難故古之權臣常合天下之爭天下且相與爭而不解則其勢無暇及我是故可以久居而不可去古之人有為之者亦李林甫是也世之人君

苟無好善之心幸而有好善之心則天下之小人皆將
賣之以為姦何者有好善之名而不察為善之實天下
之善固有可以謂之惡而天下之惡固有可以謂之善
者彼知吾之欲為善也則或先之以善而終之以惡或
有指天下之惡而飾之以善古之人有為之者石顯是
也人之將欲為此釁也將欲建此事也必先得於其君
欲成事而君有所不悅則事不可以成故古之姦雄劫
之以其所必不能其所必不能者不可為也則將反而

從吾之所欲為古之人有為之者驪姬之說獻公使之
老而避禍是也此數者天下之至情故聖人見其初而
求其終聞其聲而推其形蓋惟能察人於無故之中故
天下莫能欺何者無故者必有其故也古者明王在上
天下之小人伏而不見夫小人者豈其能無意於天下也
舉而見其情發而中其病是以愧恥退縮而不敢進臣
欲天子明知君子之情以養當世之賢公名卿而深察
小人之病以絕其自進之漸此亦天下之至明也

君術策三

蘇氏父子往往勸主上先刑罰本出申韓之餘
似非人臣告君之正特對宋仁宗似屬對病之
藥

天下之道可以理得而不可以名推其於天下不取其
形而獨取其意其道可以為善而亦可以為不善何者
其道無常其道無常者不善之所從生也夫天下之人
惟知不忍殺人之為仁也是故不忍殺人以自取不仁

之名惟知果於殺人之為義也是故不敢不殺以自取
不義之名是二名者其所以為仁者有形而其所以為
義者有狀其進也有所執其規而其退也有所蹈其矩
故其為人也不失為天下之善人而終不至於君子有
所甚而不堪有所蔽而不見此其為人是鄉黨自全之
人也今夫君子有所殺人以為仁而有所不殺以為義
義不在殺人而仁不在於不殺其進也無所據依而其
退也無所底麗故其成也天下將皆安之而其不成也

將使天下至於大亂是以天下惡其難明而畏其難就
人臣以是戒其君而人君者亦以自戒曰姑為無殺人
以為仁而姑為果於殺人以為義是其仁可以全身而
其義可以無謗於天下斯足以為無過也已矣孟子有
言曰責難於君謂之恭陳善閉邪謂之有禮而謂吾君
不能者謂之賊且夫為人臣而詔其君不曰必為大人
之仁義而曰姑為其易者以苟避天下之謗此非恐其
君之不能之故歟蓋臣聞之聖人之道惟其不可以名

稱而迹求者其為道也甚深而難成而其成也亦不若
小道之淺而無功所御甚廣而所處甚約握之甚微而
播之無極故孔子曰吾非多學而識之吾一以貫之夫
一者何也知天下萬物之理而制其所當處是為一矣
而能得吾一者甚難故夫天下之畏之者亦不足怪也
古之聖人已能知之則行之而無疑已不能知之則不
敢以已之私意而破天下之公義使已而好殺人則天
下安可盡殺以成義之名使已而不好殺人則天下安

可盡無殺以成仁之形蓋必有大臣救其已甚而補其不足使義不在於殺人而仁不在於不殺方今天下之治所不足者非仁也吏聞有以入人之罪抵重罰而未聞有以失人之罪抵深法者民間有以赦除其罪而未聞有以不義得罪於法之外者此亦足以見天子之用心矣古者君臣之間和而不同上有寬厚之君則下有守法之臣上有急切之君則下有推恩之臣凡以交濟其所不足而彌縫其闕今也君臣之風上下如一而無

以相濟是以天下苦於寬緩怠惰而不能自振此豈左右之大臣務以順從上意為悅而豈亦天子自信以為好仁之美而不喜臣下之有所矯拂哉方今之制易於行賞而重於用罰天下之以獄上者凡與死比則皆蹙額而不悅此其為意夫豈不善然天下之姦人無以深懲而切戒之者此無乃為仁而至於不仁歟臣愚以為輔君之善而補其不足此誠大臣之事苟天子自信以為善欲以一人之私好而破天下之公義則夫大臣者

猶不可為也。惟知天子之仁義而無務其迹以成匹夫之節，使大臣得參於其間而救其所短，此不亦近於天子之道歟？

唐荆川曰：仁宗寬仁之過，故當時有識之論，每如此。老泉上富公書亦如此。

君術策四

熙寧元豐時，其患在於急功利，故於御臣下不得其道。而子由習聞父兄所當仁廟時，患其用

仁過而法不行故以厲法禁之意繼之而通篇
又以君臣相猜處為感慨議論

古者君臣之間相信如父子相愛如兄弟朝廷之中優
游悅懌歡然相得而無間知無所不言言無所不盡開
心平意表裏洞達終身而不見其隙當此之時天下之
人出身以事君委命於上而無所憂懼安神定氣以觀
天下之政蕩然肆志有所欲為而上不見忌其所據者
甚堅而無疑是以士大夫皆敢進而擅天下之大功至

於後世君臣相虞皆有猜防之憂君不敢以其誠心致諸其臣而臣亦不敢直己以行事二者相與齟齬而不相信上下相顧鰓鰓然而不能以自安而尚何暇及於天下之利害故天下之事每每擾敗而無所成就臣竊傷之而以為其弊在於防禁之太深而督責之太急夫古之聖人至嚴而有所至寬至易而有所至險使天下有所易信而有所不可測用之各當其處而不失節是以天下畏其嚴而樂其寬至於後世之君徒知天下之

不可以甚寬也而用之其君臣之際使其公卿大臣終日憂懼不得安意肆志以自盡於其上而以為畏威徒知天下之不可甚嚴也而用之其法律之事使其天下之官吏欺其長上得以苟免取容不畏天子之法而以為行惠蓋其所以用之之術甚悖而不順者至於如此夫天下之人上自百官而下至於庶民其為姦安可窮盡而天子者以其一身寄乎其中論其衆寡之勢則天下至衆而天子至寡論其智詐巧偽之術則天下之衆

固必有過於天子者吾欲臨之以天子之威則彼有畏
憚而不敢言多為之隄防以御其變詐則彼之智將有
以出於隄防之所不能及是以古之聖人推之以至誠
而御之以無威容之以至寬而待之以至易以君子長
者之心待天下之士而不防其為詐談笑議論無所不
及以開其歡心故天下士大夫皆欣然而入於其中有
所愧恥而不忍為欺詐之行力行果斷而無憂懼不敢
之意其所任用雖其兄弟朋友之親而不顧徇私之名

其所誅戮雖其仇怨眦睚之人而不恤報怨之嫌何者
君臣相信之篤此所謂至嚴而有所至寬者也然至大
吏縱橫放肆犯法而無忌天下之所指目律令之所當
取則雖天子有所不可輒釋使之一入而不可解而後
天下知有所畏此所謂至易而有所至險二者其事不
同而相與為用夫是以至寬而天下無頽惰靡迤之風
至險而君臣無猜防逼迫之慮夫惟能通其君臣之歡
而盡行其刑法之所禁而後可以及此也

唐荊川曰古今說兩遍

君術策五

通篇行文如怒馬奔濤於千里之間馳驟澎湃而不可羈制者

事有若緩而其變甚急者天下之勢是也天下之人幼而習之長而成之相咻而成風相比而成俗縱橫顛倒紛紛而不知以自定當此之時其上之人刑之則懼驅之則聽其勢若無能為者然及其為變常至於破壞而

不可禦故夫天子者觀天下之勢而制其所向以定其所歸者也夫天下之人弛而縱之拱手而視其所為則其勢無所不至其狀如長江大河日夜渾渾趨於下而不能止抵曲則激激而無所洩則咆哮潰亂蕩然而四出壞隄防包陵谷汗漫而無所制故善治水者因其所入而導之則其勢不至於激怒壅湧而不可收既激矣又能徐徐而洩之則其勢不至於破決蕩溢而不可止然天下之人常狎其安流無事之不足畏也而不為去

其所激觀其激作相感潰亂未發之際而以為不至於大懼不能徐洩其怒是以遂至橫流於中原而不可卒治昔者天下既安其人皆欲安坐而守之循循以為敦厚默默以為忠信忠臣義士之氣憤悶而不得發豪俊之士不忍其鬱鬱之心起而振之而世之士大夫好勇而輕進喜氣而不懾者皆樂從而羣和之直言忤世而不顧直行犯君而无忌今之君子累累而從事於此矣然天下猶有所不從其餘風故俗猶衆而未去相與抗

拒而勝負之數未有所定邪正相搏曲直相犯二者潰
潰而不知其所終極蓋天下之勢已少激矣而上之人
不從而遂決其壅臣恐天下之賢人不勝其忿而自決
之也夫惟天子之尊有所欲為而天下從之今不為決
之於上而聽其自決則天下之不同者將悻然而不服
而天下之豪俊亦將奮踊不顧而力決之發而不中故
大者傷小者死橫潰而不可救譬如東漢之士李膺杜
密范滂張儉之黨慷慨議論本以矯拂世俗之弊而當

時之君不為分別天下之邪正以決其氣而使天下之士發憤而自決之而天下遂以大亂由此觀之則夫英雄之士不可以不少遂其意也是以治水者惟能使之日夜流注而不息則雖有蛟龍鯨鯢之患亦將順流奔走奮迅豫悅而不暇及於為變苟其瀦畜渾亂壅閉而不決則水之百怪皆將勃然放肆求以自快其意而不可禦故夫天下亦不可不為少決以順適其意也

唐荊川曰因風俗之所趨而決之子由此文真

欽定四庫全書

唐宋八大家文鈔卷一百五十七

如長江大河

唐宋八大家文鈔卷一百五十七

欽定四庫全書

唐宋八大家文鈔卷一百五十八

明 茅坤 撰

潁濱文鈔十四

策

臣事策一

重臣 古人嘗云文至韓昌黎詩至杜子美古
今能事畢矣予獨以為人臣建言感悟君上如

子由重臣一議則千古絕調也

天下有權臣有重臣二者其迹相近而難明天下之人知惡夫權臣之專而世之重臣亦遂不容於其間夫權臣者天下不可一日而有而重臣者天下不可一日而無也天下徒見其外而不察其中見其皆侵天子之權而不察其所為之不類是以舉皆嫉之而無所喜此亦已太過也今夫權臣之所為者重臣之所切齒而重臣之所取者權臣之所不顧也將為權臣耶必將內悅其

君之心委曲聽順而無所違戾外竊其生殺予奪之柄
黜陟天下以見已之權而沒其君之威惠內能使其君
歡愛悅懌無所不順而安為之上外能使其公卿大夫
百官庶吏無所不歸命而爭為之腹心上愛下順合而
為一然後權臣之勢遂成而不可拔至於重臣則不然
君有所為不可以必爭爭之不能而其事有所必不可
聽則專行而不顧待其成敗之迹著則上之心將釋然
而自解其在朝廷之中天子為之踧然而有所畏士大

夫不敢安肆怠惰於其側爵祿慶賞已得以議其可否而不求以為己之私惠刀鋸斧鉞已得以叅其輕重而不求以為己之私勢要使天子有所不可必為而羣下有所震懼而已不與其利何者為重臣者不待天下之歸已而為權臣者亦無所事天子之畏已也故各因其行事而觀其意之所在則天下誰可欺者臣故曰為天下安可一日無重臣也且今使天下而無重臣則朝廷之事惟天子之所為而無所可否雖天子有納諫之

明而百官畏懼戰慄無平昔尊重之勢誰肯觸忌諱冒
罪戾而為天下言者惟其小小得失之際乃敢上章謹
譁而無所憚至於國之大事安危存亡之所繫則將卷
舌而去誰敢發而受其禍此人主之所大患也悲夫後
世之君徒見天下之權臣出入唯唯以為有禮而不知
此乃所以潛潰其國徒見天下之重臣剛毅果敢喜逆
其意則以為不遜而不知其有社稷之慮二者淆亂於
心而不能辨其邪正是以喪亂相仍而不悟何足傷也

昔者衛太子聚兵以誅江充武帝震怒發兵而攻之京師至使丞相太子相與交戰不勝而走又使天下極其所往而翦滅其迹當此之時苟有重臣出身而當之擁護太子以待上意之少解徐發其所蔽而開其所怒則其父子之際尚可得而全也惟無重臣故天下皆知之而不敢言臣愚以為凡為天下宜有以養其重臣之威使天下百官有所畏忌而緩急之間能有所堅忍持重而不可奪者竊觀方今四海無變非常之事宜其息而

不作然及今日而慮之則可以無異日之患不然者誰能知其果無有也而不為之計哉抑臣聞之今世之弊在於法禁太密一舉足不如律令法吏且以為言而不問其意之所屬是以雖天子之大臣亦安敢有所為於法律之外以安天下之大事故為天子之計莫若少寬其法使大臣得有所守而不為法之所奪昔申屠嘉為丞相至召天子之倖臣鄧通立之堂下而詰責其過是時通幾至於死而不救天子知之亦不以為怪而申屠

嘉亦卒非漢之權臣由此觀之重臣何損於天下哉

臣事策二

明罰 通篇多曲折而透荆川謂此篇全在虛語處著精神良是

仲尼之稱管仲曰奪伯氏駢邑三百飯蔬食沒齒無怨言又讀蜀志其言諸葛孔明遷李平殛廖立及孔明既死而此二人皆哭泣有至死者臣每讀其書至此未嘗不嗟嘆古人之不可及而竊愍今世之不能也夫為天下

國家惟剛者能守其法而公者能以剛服天下曾子曰
士不可以不弘毅任重而道遠天下者天子之天下也
賞罰之柄予奪之事其出於天子本無敢言者惟其不
公故有一人焉受戮而去雖其當罪而亦勃然有不服
之心而上之人雖其甚公於此而亦畏其不服而不敢
顯然明斥其罪故夫天下之不公足以敗天下之至剛
而天下之不剛亦足以破天下之至公二者相與並行
然後可以深服天下之衆臣嘗竊悲唐季五代之亂外

有執兵強忿之臣威蓋天下而以其力內脅天子天子不敢輒忤其意意有所不悅則其上下不能自保當此之時人主務為安身之政不敢以其剛心而守其公事此其勢不得不然耳方今海內治安外無諸侯之虞而內無執政之患然臣切觀之於政令刑賞之際常若有所畏而不敢自必者此其故何也夫朝廷之臣無罪而留有罪而黜此為臣之常也故其有罪以為當黜則官必削以為不當黜則無故而置之外地猶為不可也今

有罪而推之於外反從而增其爵秩是將以為賞耶為刑耶是不可得而知也蓋曰姑以鎮撫其耿耿之意彼其夫為近臣而去也雖賜之千金而猶有所慊然於其心且天下之罪人而皆欲滿其所懷則為天子安可以有所刑戮哉然而事之所不平者又非特如此也黜之者一人則必有排而辨之者一人以為黜者之有所不悅乎其辨之者也而使與之皆黜夫此二人其罪果誰在乎以其言而黜人亦以其言而黜之是為黜者報仇

耳是以天下雖無強臣之災而臣下竊揣天子之心皆有所持而邀之此其弊始於執之不剛而成於守之不公夫朝廷之事臣安得知其有所不公者然竊怪每有所除吏民間莫不切切口語以為此誰人之親戚故舊而得之者每有所措置亦莫不以為此誰人之所欲而行之者使上之人凡果如此則宜乎人之受罪而不服而吾亦不敢以加於人也詩云人亦有言柔則茹之剛則吐之唯仲山甫柔亦不茹剛亦不吐不侮鰥寡不畏

強禦夫人唯能不侮鰥寡也而後能不畏強禦臣故曰
惟公者能以剛服天下此其勢然也且夫古之為君者
有所大樂而今世不知也人君之樂非樂夫有天下而
樂得與天下去惡而獎善以快吾志今使天下有不義
之臣誅之不獲又從而尊之尊之不足以為悅而又從
而黜其所怨以慰其盛怒此二事者夫豈為君之樂哉
蓋事有所不可並從而欲不可以皆得今夫人之有所
私愛而不公者是亦人之所樂焉耳然其為樂有所害

於為君之樂是以不若棄彼而全此也且事之利害有知之而患不可為者有患不知之而知之則可行者今欲潔然無私而行吾法之所至有罪而黜黜而無所姑息使天下皆知賞之為賞罰之為罰此非有所勤苦而難成者而顧患不肯為夫管仲孔明惟其為之而已矣

唐荆川曰略援古事專論時弊立柱子

此一篇議論專以宋真仁來往往言官指擿執政輒以使相除之出鎮外郡或反增其秩而其

言官又不免遷謫嶺表此皆宋之優禮大臣之過而殊不當於天下之公議故有此論

臣事策三

作士氣 通篇如流風掣雲舉子業中神解也
天下有無窮之才不叩則不鳴不觸則不發是以古之
聖人迎其好善之端而作其勉強之氣洗濯磨淬日夜
不息凡此將以求盡天下之無窮也夫天下譬如太器
焉有器不用而寘諸牖下久則蟲生其中故善用器者

提攜不去時濯而溉之使之日親於人而獲盡其力以無逮敗有小丈夫徒知愛其器而不知所以為愛也知措諸地之安而不知不釋吾手之為不壞也是以事不得成而其器速朽且夫天下之物人則皆用其形而不求其神也神者何也物之精華果銳之氣也精華果銳之氣其在物也瞪然而有光確然而能堅是氣也亡則物皆枵然無所用之夫是氣也時叩而存之則日長而不衰置而不知求則脫去而不居是氣也物莫不有也

而人為甚孟子有言曰人之日夜之所息與平旦之氣
晝日之所為有以梏亡之矣梏之反覆則其夜氣不足
以存夫夜氣者所謂精華果銳之氣也天下亂則君子
有以自養而全之而天下治則天子養之以求其用今
夫朝廷之精明戰陣之勇力獄訟之所以能盡其情而
錢穀之所以能治其要處天下之紛紜而物莫能亂者
皆是氣之所為也蓋古者英雄之君唯能叩天下之才
而存之是以所求而必從所欲而必得漢武帝唐太宗

國富而兵強所欲如意而天下之才用之不見其盡當其季年元臣宿將死者大半而新進之士亦有足以辦天下由此觀之則天下固有無窮之才而獨患乎上之不叩不觸而使其神弛放而不張也臣竊觀當今之人治文章習議論明會計聽獄訟所以為治者其類莫不備具而天下之所少者獨將帥武力之臣往者天下既安先世老將已死而西寇作難當此之時天子茫然反顧思得奇才良將以屬之兵而終莫可得其後數年邊

鄙日蹙兵勢日急士大夫始漸習兵而西夏臣服以至
于今又將十有餘年而曩之所謂西邊之良將者亦已
畧盡矣而天下之人未知誰可任以為將此甚可慮也
夫天下之事莫難於用兵而今世之所畏莫甚於為將
責之以難事強之以其所甚畏而不作其氣是以將帥
之士若此不可得也蓋嘗聞之善用兵者雖匹夫之賤
亦莫不養其氣而後求其用方其未戰也使之投石超
距以致其勇故其後遇敵而不懼見難而效死何者氣

盛故也今天下有大弊二以天下之治安而薄天下之武臣以天下之冗官而廢天下之武舉彼其見天下之方然則推沮退縮而無自喜之意今之武臣其子孫之家往往轉而從進士矣故臣欲復武舉重武臣而天子時亦親試之以騎射以觀其能否而為之賞罰如唐貞觀之故事雖未足以盡天下之奇才要以使之知上意之所悅有以自重而爭盡其力則夫將帥之士可以漸見矣

空引 此與坡公蓄材用篇皆言武舉之不可
廢而其文故為紆徐百折譬之走江漢之水數
千里而到海則一壑耳

臣事策四

委兵權 本前篇重武臣中抽出將之專兵來
並宋時對病之藥而文曲而毫

天下之患無常處也惟見天下之患而去之就其所安
而從之則可久而無憂有淺丈夫見其生於東也而盡

力於東以忘其西見其起於外也而銳意於外以忘其中是以禍生於無常而變起於不測莫能救也昔者西漢之禍當文景之世天下莫不以為必起於諸侯之太強也然至武帝之時七國之餘日以漸衰天下坦然四顧以為無虞而陵夷至於元成之間朝廷之強臣實制其命而漢以不祀世祖顯宗既平天下以為世之所患莫不在乎朝廷之強臣矣而東漢之亡其禍乃起於宦官由此觀之則天下之患安在其防之哉人之將死也

或病於太勞或病於飲酒天下之人見其死於此也而
曰必無勞力與飲酒則是不亦拘而害事哉彼其死也
必有以啟之是以勞力而能為災飲酒而能為病而天
下之人豈必皆死於此昔唐季五代之亂果何在也海
內之兵各隸其將大者數十萬人而小者不下數萬撫
循鞠養美衣豐食同其甘苦而順其好惡甚者養以為
子而授之以其姓故當是時軍旅之士各知其將而不
識天子之惠君有所令不從而聽其將而將之所為雖

有大姦不義而無所違拒故其亂也姦臣擅命擁兵而不可制而方其不為亂也所攻而必降所守而必固良將勁兵徧於天下其所摧敗破滅足以上快天子鬱鬱之心而外抗敵國竊發之難何者兵安其將而樂為用命也然今世之人遂以其亂為戒而不收其功舉天下之兵數百萬人而不立素將將兵者無腹心親愛之兵而士卒亦無附著而欲為之效命者故命將之日士卒不知其何人皆莫敢仰視其面夫莫敢仰視是禍之本

也此其為禍非有脅從駢起之殃緩則畏而怨之而有
急則無不忍之意此二者用兵之深忌而當今之人蓋
亦已知之矣然而不敢改者畏唐季五代之禍也而臣
竊以為不然天下之事有此利也則必有此害天下之
無全利是聖人之所不能如之何也而聖人之所能要
在不究其利利未究而變其方使其害未至而事已遷
故能享天下之利而不受其害昔唐季五代之法豈不
大利於世惟其利已盡而不知變是以其害隨之而生

故我太祖太宗以為不可以長久而改易其政以便一時之安為將者去其兵權而為兵者使不知將凡此皆所以杜天下之私恩而破其私計其意以為足以變五代豪將之風而非以為後世之可長用也故臣以為當今之勢不變其法無以求成功且夫邀天下之大利則必有所犯天下之危欲享大利而顧其全安則事不可成而方今之弊在乎不欲有所搖撼而徒得天下之利不欲有所勞苦而遂致天下之安今夫欲人之成功必

先捐兵以與人欲先捐兵以與人則先事於擇將擇將而得之苟誠知其忠雖捐天下以與之而無憂而況數萬之兵哉昔唐之亂其為變者非其所命之將也而皆其盜賊之人所不得已而以為將者故夫將帥豈必盡疑其為姦要以無畏其擇之之勞而遂以破天下之大利益天下之患夫豈必在此也

此論宋鑒五代將權之重而其弊貽於弱而不振而今國家邊徼之將特如一有司之按資叙

遷而不復有財賦之恣其出入甲兵之擅其刑
殺節鉞所向稍有出格則言官且議其後而朝
廷之削罰且及之矣況郡縣藩臬得以抗撫臣
得以制而御史又從而繩其後愚故曰古今來
之將權之太輕莫有甚於今日也

臣事策五

養兵 此則於將兵中又拈出一護軍者以調
攝恩威之用而文章疾徐頓挫可以呼盪胸臆

天下之勇士可使用兵而不可使主兵天下之智士可使主兵而不可使養兵養兵者君子之事也故用兵之難而養兵為尤難何者士氣之難伏也舉兵而征行三軍之士其心在號令而其氣在戰息兵而為營三軍之士其心在壘壁而其氣在禦陣兵而遇敵三軍之士其心在白刃而其氣在勝氣之所在者毒之所向也故兵在外士氣在敵而不在其上不在其上是故撫之而易悅予之而易足誅之而易定動之而易使其上之人御

之以勇而驅之以智則百萬之衆可以無足憂者及夫天下既安三軍之士各反其家美衣甘食優游無為投石超距不足以洩其怒而各求其上之所短當此之時軍中之士環視四顧而始不可忍矣是故久於不用則其意不欲復戰久於不使則其意不欲復役夫惟不欲而強使之與之出戰則不樂而與之從役則為亂此必然之勢也夫古者兵出於農其欲動之尤難然當周之季諸侯之強天下之民日起而操兵齊晉秦楚以其兵

車徜徉天下萬里而後反而天下之民不敢言病至於
後世平居無事常竭天下以養士卒一旦有急當得其
力乃反傲睨邀賞不肯即去夫其平時衣食其上有難
而起起而鬪死有事而役役而盡力此其勢宜若愈於
三代之農夫矣而當今方病其不然此豈非其養之之
過歟臣觀天下之兵其數莫如京師之多而士卒之趨
起難制亦莫如京師之甚何者天子在位以仁御兵士
不知戰而狃於賞令之稍急則瞋目攘臂而言不遜此

甚可惡也且京師宗廟禁闈之所在而使不義之徒周
環布列於其左右而尚何以為安臣聞養兵而兵驕戾
其責在將方今京師之將所任者誰乎匹夫小人以次
當遷而為之什百之長此其為名尚未離乎卒伍也而
其上之所統獨有三太尉推而上之則至於樞密使如
此四大臣者非在什伍部曲之間以日夕訓練之者也
且夫卒未親附而罰之則不服不服則難用也今使大
臣獨制其上恩意不交而德澤不洽上下不相信特以

勢相從而無以義附者則是未可以法治也使朝廷大臣而曲躬偃倮親問疾苦如異時出兵行陣之間此則其勢有所不給矣古者南北軍有監軍御史有護軍諸校各有軍正正丞是以任安胡建之徒忠信守節之士得以出入軍中獲其歡心而後訓之以禮繩之以法有以誅滅而士卒皆服如此而後兵可用也今奈何獨使狼戾之人自相臨御而天子獨以貪暴無知之匹夫為左右之衛哉臣愚以為略如漢制設為諸校使常處軍

中既以撫之且漸誅戮其豪橫而訓之知禮傳曰晉悼公知樂糾之能御以和于政也以為戎御使訓諸御知義知荀賓之有力而不暴也以為戎右使訓勇力之士時使故軍中之吏非其近之則不能得其歡心不得其心則雖有法而不能用有法不能用則士不可以勞苦而兵不可以應卒有兵不可以應卒而有將不能以使衆此最天下之大患也

宋中葉益州兵驕而京軍尤甚故子由論得情

事曲匱而今國家西北養兵患在財賦不充無
以秦嫖姚之士而死於戰東南養兵患在號令
不肅無以習向背之實而抗其賊

唐宋八大家文鈔卷一百五十八

欽定四庫全書

唐宋八大家文鈔卷一百五十九

明 茅坤 撰

潁濱文鈔十五

策

臣事策六

厲羣臣 此篇議論大略與世之論考課資格者相參

聖人之治天下常使人有孜孜不已之意下自一介之民與凡百執事之人咸願竭其力以自附於上而上至公卿大夫雖其甚尊志得意滿無所求望而亦莫不勞苦其思慮日夜求進而不息至有一沐而三握一飯而三吐食不暇飽卧不暇暖汲汲於事常若有所未足者是以天下之事小大畢舉無所廢敗而上之人可以不勞力而萬事皆理昔者世之隆替臣嘗已略觀之矣當堯舜之時洪水橫流民不粒食事變繁多災害並興而

堯舜之身至於垂拱而無為何者天下之人各為之用
力而不辭也至於末世海內人安四方無虞人生於其
間其勢皆有怠荒之心各安其所而不願有所興作故
天下漸以衰憊而不振詩曰周雖舊邦其命維新夫國
之所以至於亡者惟其舊而無以新之歟天下舊而不
復新則其事業有所斷而不復續當此之時而不知與
之相期於長久不已之道而時作其怠惰之氣則天下
之事幾乎息矣今夫道路之人使之趨十里而與之百

錢則十里而止使之趨百里而與之千錢則百里而止何者所與期者止於十里與百里而其利亦止於此而已今世之士何以異此出於布衣者其志不過一命之祿既命則忘其布衣之學仕於州縣者其志不過於改官之寵既改則喪其州縣之節自是以上因循遞遷十有餘年之間則其勢自至於郡守此不待有所修飾而至者其志極矣幸而其間有欲持自奮厲之心然後其意稍廣而不肯自棄於貪汙之黨外自漕刑內自臺諫

館閣而至於兩制亦又極矣又幸而有求為宰相者則其志又益廣至於宰相而極矣蓋天子之所以使天下慕悅而樂為吾用者下自一命之臣而上至宰相其節級相次者有四而已彼其一命者或無望於改官郡守者或無望於兩制兩制者或無望於宰相而為宰相者無所復望或各安於其所而誰肯為天子盡力者且夫世之士大夫如此其衆也仁人君子如此其不少也而臣何敢妄有以詆之哉蓋臣聞之方今之人其已改官

者其廉隅節幹之效常不若其在州縣之時而為兩制者其慷慨勁挺之操常不若其為漕刑臺諫之日雖其奇才偉人卓然特立不為利變者固不在此而世之為此者亦已衆矣夫以爵祿而勸天下爵祿已極則人之怠心生以術使天下則天下之人終身奔走而不知止昔者漢之官吏自縣令而為刺史自刺史而為郡守自郡守而為九卿自九卿而為三公自下而上至於人臣之極者亦有四而已然當此之時吏久於官而不知厭

方今朝廷郡縣之職列級分等不可勝數從其下而為之三歲而一遷至於終身可以無倦矣而人亦各自知其分之所止其清高顯榮者雖至老死而不可輒入是以在位者皆懈而不自奮何者彼能通其君臣之歡坦然其無高下峻絕不可扳援之勢而吾則不然今天下之小臣因其朝見而勞其勤苦丁寧訪問以開導其心志且時擇其尤勤苦者有以賜予之使知朝廷之不甚遠而容有冀於其間上之大吏時召而賜之閒燕與之

講論政事而勉之於功名相邀於後世不朽之際與夫子孫皆享其福之利時亦有以督責其荒怠弛廢之愆使之有所愧恥於天子之恩竟而不倦於事此豈非臣所謂奔走天下之術歟

臣事策七

督監司 以當時御史為能盡法以督州郡之吏而監司以上不免優游養望以待兩制而不能盡如為御史者抗法以提職大略今亦近之

聖人之於人不恃其必然而恃吾有以使之不恃其皆
賢而恃吾有以驅之夫使天下之人皆有忠信正直之
心則為天下安俟乎聖人惟其不然是以使之有方驅
之有術不可一日而去也今夫天下之官莫不以為可
任而後任之矣上自兩府之大臣而下至於九品之賤
吏近自朝廷之中而遠至於千里之外上下相侔而左
右相覺不為不密也然又內為之御史而外為之漕刑
使督察天下之姦人而糾其不法如此則天下何恃其

皆賢而期之以必然哉然尚有所未盡者蓋天下之事
任人不若任勢而變吏不如變法法行而勢立則天下
之吏雖其非賢而皆欲勉強以求成功故天子可以不
勞而得忠良之臣今世之弊任弊法而用不便之勢勞
苦於求賢而不知為法之弊是以天下幸而得賢則可
以僥倖於治安不幸而無賢焉則遂靡靡而無振且御
史漕刑天子之所恃以知百官之能否者也今不為之
立法而望其皆賢故臣所謂有所未盡者謂此事也夫

此二官雖其內外之不同而其與擊搏羣下權勢輕重
本無以相遠也而自近歲以來為御史者莫不洗濯磨
淬以自見其圭角慷慨論列不顧天下之怨是以朝廷
之中上無容姦而下無宿詐正直之人莫不相慶以為
庶幾可以大治然臣愚以謂方今內肅而外不振千里
之外貪吏晝日取人之金而莫之或禁遠人咨嗟無所
告訴莫不飲泣太息仰而呼天者深惟國家所以設漕
刑之意正以天下有此等不平之故耳今海內幸無變

而遠方之民戚然皆苦貪吏之禍則所謂漕刑者尚何
以為然人之性不甚相遠豈其為御史則皆有嫉惡之
心而至於漕刑則皆得鹵莽苟容之人蓋上之所以使
之者未至也臣觀御史之職雖其屬官之中苟有能出
身盡命排擊天下之姦邪則數年之間可以至於兩制
而無難而其不能者退斥罷免不免為碌碌之更是以
御史皆務為訐直之行而漕刑之官雖端坐默默無所
發摘其終亦不失為兩制而其抗直不撓者亦不過如

此而徒取天下之怨是以皆好為寬仁以收敦厚之名
豈國家知用之御史而不知用之漕刑哉臣欲使兩府
大臣詳察天下漕刑之官唯其有所舉按不畏強禦者
而後使得至於兩制而其不然者不免為常吏變法而
任勢與之更新使天下之官吏各從其勢之所便而為
之而其上之人得賢而任之則固已大善如其不幸而
無賢則亦不至於紛亂而不可治雖夫庸人亦可使之
自力而為政如此則天下將內嚴而外明姦吏求以自

伏而不得其處天下庶乎可以為治矣

今日之弊愚尤怪夫為監司者往往頤指氣使
於御史以苟且其奔走之令而不能如國家故
設監司與御史互相督察以平其政而拊循其
民此所以一御史習練而長厚而一道之吏民
皆帖席矣一御史好為擊搏而一道之吏民皆
騷驛而殘破矣愚故曰今能察各道監司之中
以博大持政而與御史相持以平其反者歲擢

一二人以為卿寺此亦足以按兩漢重二千石之權之意而為御史者不至於怙權作威也

臣事策八

破例大體與抑僥倖篇同 子由此文有大將揮兵之勢縱橫闔闢無不如意第一等科場文字

天下惟其有權者可以使人有利者可以得衆權者天下之所為去就也利者天下之所為奔走也能是非可

否者之謂權能貧富貴賤者之謂利天子者收天下之權而自執之歛天下之利而親用之者也故天下之人上自公卿大夫之尊而下至於閭閻匹夫之賤府史胥徒僮僕奴妾以次相屬而相役至於疲弊勞苦老死而不去緩急可以使之相救危難可以使之相死蹈白刃赴深谷可使用命而不敢辭何者彼利於人者固役於人也千金之家持其贏餘以貸鄰里之貧民薄息緩取而可以豪橫於鄉黨刺客武士為之效死而莫之能

制此權利之所致也臣聞天子者執天下之權而擅四海九州之利爵祿慶賞金玉錢幣此其富非特千金之利也予奪可否刑戮誅滅此其勢非特千金之權也古之人君得天下之權利而專之是故所為而成所欲而就謀臣猛將為之盡力有死而無二社稷之臣可使死宗廟郡縣之臣可使死封疆文吏可使死其職武吏可使死其兵天下之人其存心積慮皆以為當然是以寇至而不懼難生而無變方其平居無事之際天子衣食

而養之以待天下之事故有事而死亦其勢然也然當今天下之人食天子之祿被天子之爵衣青紫佩印綬從吏卒縱橫赫奕者常徧天下一旦有急皆莫肯死者此甚可怪也往年廣南之亂大吏據城擁兵賊至而莫敢擊逃遁奔竄伏於草莽之間以避兵革之禍至使蠻夷之人得以橫行於中原人民流離方數千里幾為丘墟而無一死戰之吏國家每歲收天下之士士之發於饑寒取官而去者動以數百為輩六年之間考足而無

過則又為之改爵而增其祿秩幸而有超羣拔類之才則公卿大臣又得薦之於天子而特寵貴之翱翔朝廷之間不出十年可以安坐談笑而為兩制此其為法尚何所負於天下而士大夫終莫肯奮而為之用何也夫明哲之君以其法邀天下今天下之人反以其法邀之故邀在我則奔走者人也邀在人則奔走者我也今世之法夫豈不欲以邀人哉涖官六七考求舉者五六人凡此皆備具而無所過失然後為之改爵而增其祿秩

夫此豈誠足以邀人哉為法而不足以邀人則人將反以吾法而相邀今之官吏考足而無過且有舉者則天子寧有以却之耶是不得不從而予之矣如此則是天子之爵祿非天子之惠而天下之勢也士大夫以勢取爵祿是以舉皆不德其上凡今天子之權反而入於下而天子之利變而為輕取易得之物矣蓋臣聞天下有二弊有法亂之弊有法弊之弊法亂則使人紛紛而無所執法弊則使人牽制而不自得古之聖人法亂則以

立法救之而法弊則受之以無法夫無法者非縱橫放肆之謂也上之人投棄規矩而使天下無所執以邀其君是之謂無法今夫官吏之法其亦無自舉者與考而已使一二人得詳其才與不才舉者具而考足才者與之而不才者置之雖有考不足而舉者不具其可與者則亦與之也凡皆務與天下為所不可測使吏無所執吾法以邀我收天子之權利而歸之於上如此則議者將以為蕩然無法則大吏易以為姦臣聞人惟不為

姦也而後任以為大吏苟天下之廣而無一二大臣可信者則國非其國矣且自唐季以來世之設法者始皆務以防其大臣蓋唐之盛時其所以試天下之士與調天下之選人者皆無一定之法而惟有司之為聽夫是以下不得邀其上而有以役其下臣故曰惟有權者可以使人有利者可以得衆此不可不深察也

通篇總只是感嘆宋天子失權利而不能必天下之士為之感奮而效死議論滾滾不窮譬如

蜀江之出峽而一瀉千里激之為湍流之為川
冒城郭溢州郡而不知其所止也

臣事策九

近任 古者之仕不出百里之國今國家小吏
往往萬里驅馳甚不是體可與曾子固送江任
序同看

聖人之為天下不務逆人之心人心之所向因而順之
人心之所去因而廢之故天下樂從其所為惟其一人

之所欲不可以施於天下不得已而後有所矯拂而不用蓋非以為天下之人皆不可以順適其意也昔生民之初生而有饑寒牝牡之患飲食男女之際天下之所同欲也而聖人不求絕其情又從而為之節文教之炮燔烹飪嫁娶生養之道使皆得其志是以天下安其法而不怨後世有小丈夫不達其意之本末而以為禮義之教皆聖人之所作為以制天下之非僻徒見天下邪故之民皆不便於禮義之法乃欲務矯天下之情置其

所好而施其所惡此何其不思之甚也且雖聖人不能有所特設以驅天下蓋因天下之所安而遂成其法如此而已如使聖人而不與天下同心違衆矯世以自立其說則天下幾何其不叛而去也今之說者則不然以為天下之私欲必有害於國之公事而國之公事亦必有所拂於天下之私欲分而異之使天下公私之際譬如胡越之不可以相通不恤人情之所不安而獨求見其所以為至公而無私者蓋事之不通莫不由此之故

今夫人之情非其所樂而強使為之則皆有怏怏不快之心是故所為而無成所任而不稱其職臣聞方今之制吏之生於南者必置於北生於東者必投於西嶺南吳越之人而必使冒苦寒踐霜雪以治燕趙之事秦隴蜀漢之士而必使涉江湖衝霧露以守揚越之地雖其上之人逼而行之無所不從而行者望其所之怨嘆咨嗟不能以自安吏卒送迎於道路遠者涉數十里財用殫竭困弊於外既至而好惡不相通風俗不相習耳目

之所見飲食之所便皆不得其當譬如僑居於他鄉其
心常屑屑而不舒數日求去而不肯慮長久之計民不
喜其吏而吏不喜其俗二者相與齟齬而不合以不暇
有所施設而吏之坐於其地者莫不自以為天下之所
不若而今之法為吏者不得還處其鄉里雖數百里之
外亦輒不可而又以京師之所在而定天下遠近之次
凡京師之人所謂近者皆四方之所謂至遠而京師之
所謂遠者或四方之所謂近也今欲以近優累勞之吏

而不知其有不樂者為此之故也且夫人生於鄉閭之中其親戚墳墓不過百里之間至於千里之內則譬如道路之人亦何所施其私而又風俗相安上下相知其利害而詳其好惡近者安處其近而遠者樂得其遠二者各獲其所求而無有求去之心耳目開明而心不亂可以容有所立凡此數者蓋亦無損於國矣而特守此區區無益之公此豈王者之意哉且三代之時九州之中建國千有八百大者不過百里而小者數十里數

十里之間民之為士者有之為大夫者有之凡所以治其國人者亦其國人也安得異國之人而後用哉臣愚以謂如此之類可一切革去以順天下之欲今使天下之吏皆同為姦則雖非其鄉里而亦不可有所優容苟以為可任則雖其父母之國豈必多置節目以防其弊而況處之數百千里之間哉

近來儒官與雜流俱以本土之人注選苟州縣以及郡佐貳亦皆如之則善矣

臣事策十

祿胥史 行文如風行水上

大人之道行之而可名名之而可言布之天下而無疑
施之後世而無愧堂堂乎立於四海雖一介之士而無
所不安此其所以為大人之道歟今夫天下之人天子
誰不役其力者而天下皆不敢以為非此誠得其可役
之名而役之是以天子安坐於上而士大夫為之奔走
於下大者為之運籌畫策治百官以濟其大事而小者

為之按米鹽視鞭箠以奉其小職文吏為之簿書會計
詳其出入取予之數而使天下不敢欺武吏為之擇金
被革習其戰陣攻鬪之事而使天下不敢犯勞苦其筋
力而罄竭其思慮甚者捐首領暴骨肉於原野而不知
避何者食其祿也至於田野之民耕田而食或生而不
至市井然及其有稅而可役趨走於縣吏之前恭謹有
禮不教而自習而其尤難者至使之斬捕盜賊挽弓巡
徼疲弊而不敢求免此豈非食其地之故歟故夫天下

之人凡天子之所得而使令者皆可得而名也而臣切怪府史胥徒古者皆有祿以食其家而其不足者皆得計口而受田以補其不給夫是以能使之盡力於公事而不卹其私計蓋周之所謂官田者府史胥徒之田也而今世之法收市人而補以為吏無祿以養其身而無田以畜其妻子又有鞭扑戮辱之患而天下之人皆喜為之其所以責之者甚煩且難而其所以使之者無名而可言而其甚者又使之反入錢而後補雖得復役而

其所免不足以償其終身之勞此獨何也天子以無名使之而天下之人亦肯以無名而為之此豈可不求其情哉夫天子舉四海而寄之其臣郡縣之官又舉而寄之其郡縣之小吏刑法之輕重財用之多少無所不在是以掌倉庫者得以為盜而治獄訟者得以為姦為姦之利上足以養父母而下足以畜妻子其所以無故而安為之者為此之故也是以雖無爵祿之勸而可得而使雖有刑戮恥辱之患而不肯捨而去而其上之人驅

其無祿之身而遇之以有祿之法恬不為怪此乃公使之為姦以當其所當得之祿而遂以為可得而使也如此則尚何以示天下臣愚以為凡人之在官不可以無故而用其力或使其稅而或使其祿故夫府史胥吏不可以無祿使也然臣觀之方今天下苦財用之不给而用度有所不足其勢必無以及此而古者周官之法民之為訟者入束矢為獄者入鈞金視其不直者而納其所入蓋自秦漢以來其法始廢而不用今臣亦欲

使天下之至於獄者皆有所入於官以自見其直而其
不直者亦皆沒其所入以為胥吏之俸祿辨其等差而
別其多少以時給之以足其衣食之用其所以取之於
民者不苛而其所以為利者甚博蓋上之於民常患其
好訟而不直以身試法而無所畏忌刑之而又使之有
入於官此所以深懲其心而又其所得止以厚吏此有
以見乎非貪民之財也而為吏者可以無俟為姦而有
以自養名正而言順雖其為姦從而戮之則亦無愧乎

吾心嗚呼古之所謂名正者猶此類也夫

唐宋八大家文鈔卷一百五十九